

## **Tupanit nioqqusiat nalunaaqutserneqartarneri pillugit Namminersorlutik Oqartussat nalunaarutaat nr. 6, 10. april 2015**

Tupa avatangiisinillu pujortarfiunngitsunik isumannaarineq kiisalu tupanik nioqqusiat nalunaaqutserneqartarneri pillugit Inatsisartut peqqussutaanni nr. 10-mi, 14. november 2004-meersumi § 10 imm. 2 aamma § 14 Inatsisartut peqqussutaanni nr. 6-imi 26. maj 2010-meersumi allanngortinneqartoq naapertorlugu makku aalajangersarneqarput:

### Atuuffissat

**§ 1.** Nalunaarut tupanik nioqqusiat Kalaallit Nunaannut tuniniagassatut eqqunneqartut mianersoqqutitaannut atuuppoq.

### Nassuiaat

**§ 2.** Nalunaarummi matumani taaguutit ataani taaneqartut ima paasineqassapput:

- 1) ”tupat poortat”: poortaq imaluunniit tupanik tuniniaanermi poortakkaarlugit tuniniarneqartartuni poorineqartoq sunaluunniit,
- 2) ”mianersoqqussut nalinginnaasoq”: mianersoqqussut § 3 imm. 1-imi taaneqartoq,
- 3) ”mianersoqqussut katitaaq”: mianersoqqussut tassaasoq assiliaq takussutissarluunniit alla oqaatsit mianersoqqussutit tassunga tunngasut ilanngussaq 1-imi taaneqartut ilanngullugit.

### Mianersoqqussutit oqaasertaat

**§ 3.** Poortat tupanit nioqqutissianik imaqartut tamarmik mianersoqqussutit nalinginnaasut uku arlaannik oqaasertalerneqassapput:

- 1) ”Pujortartarneq toqquataasinnaavoq” imaluunniit
- 2) ”Pujortartarneq ilinnut avatangiisinnullu annertuumik ajoqutaavoq”,  
Imm. 2. Taamaakkaluartoq Imm. 1-imi aalajangersagaq tupanut pujuliunngitsunut atuutinngilaq, taakku mianersoqqussummik uannga oqaasertaqassapput: ”Tupanit nioqqusiaq manna peqqissutsimut ajoqusiisinnaavoq pinngitsoorsinnaajunnaarnermillu kinguneqartarluni”.
- Imm. 3. Imm. 1-imi mianersoqqussutit nalinginnaasut taaneqartut tamarmik atorineqassapput akuttunngitsumillu paarlakaattarnissai naqinneqartarnissaallu isumannaarneqassaaq.
- Imm. 4. Imm. 1-imi mianersoqqussutit nalinginnaasut taaneqartut imm. 2-milu mianersoqqussut taaneqartoq poortap sinaanut ersarinnerpaap aappaanut naqinneqassaaq.

Imm. 5. Tupanit nioqqusiat poortakkaarlugit tuniniarneqartartuni tuniniaanermi atorneqartumik qalleqqillugit poorneqarsimappata taava mianersoqqussutit imm. 1-imi taaneqartut mianersoqqussut imm. 2-milu taaneqartut poortamut tassunga aamma naqiterneqassapput, tassa poortaq akimut ersinngippat.

§ 4. Tupanit nioqqusiat poortat tamarmik mianersoqqussummik katitamik ilanngussaq 1-imi nalunaarsukkat akornanneersumik pilerneqassapput.

Imm. 2. Taamaakkaluartoq Imm. 1-imi aalajangersagaq tupanut pujuliunngitsunut atuutinngilaq.

Imm. 3. Mianersoqqussutit katitigaasut imm. 1-imi taaneqartut tamarmik atorneqassapput akuttunngitsumillu paarlakaattarnissai naqinneqartarnissaallu isumannaarneqassaaq.

Imm. 4. Imm. 1-imi taaneqartut mianersoqqussutit katitigaasut poortukkap sinaami ersarinnerpaat aappaannut naqinneqassapput.

Imm. 5. Tupanit nioqqutit poortakkaarlugit tuniniarneqartartuni tuniniaanermi atorneqartumik qalleqqillugit poorneqarsimappata taava mianersoqqussutit imm. 1-imi taaneqartut aamma poorisamut tassunga naqiterneqassapput, tassa poortaq taanna akimut ersinngippat.

#### Mianersoqqussutit ilusii

§ 5. Mianersoqqussut nalinginnaasooq § 3 imm. 1-imi taaneqartoq aamma mianersoqqussut § 3 imm. 2-mi (tupa pujuliunngitsoq) taaneqartoq saneqqami pineqartumi qaavata minnerpaamik 32 procentia qallersimassavaa.

Imm. 2. Mianersoqqussut katitigaasooq § 4 imm. 1-imi taaneqartoq saneqqami pineqartumi qaavata minnerpaamik 45 procentia qallersimassavaa.

Imm. 3. Poortami nioqqutissanut allanut cigarettiunngitsunut atugassaasuni qaavi ersarinnerpaasut 75 cm 2-mit anginerusut, mianersoqqussutit § 3 imm. 1-imi aamma § 4 imm. 1-imi taaneqartut qaavata angissusia minnerpaamik 24cm<sup>2</sup> qallerisimassavaa.

Imm. 4. Poortami nioqqutissanut allanut cigarettiunngitsunut atugassaasuni mianersoqqussutit § 3 imm. 1-imi aamma § 4 imm. 1-imi taaneqartut nipittartoq ilisarnaat atorlugu inissinneqarsinnaapput, ilisarnaatit nipittartut taakku peerneqarsinnaanngippata. Ilisarnaatit aalajangersarneqassapput angissutsit pingasut atorlugit, ilisarnaat sapinngisamik annerpaaq poortamut ataatsimut atorneqarluni. Kalaallit Nunaannut nioqqutissanik eqqussuisooq pisinnaatitaavoq nammineq ilisarnaatit nipitinnissaanut, tamanna niuertarfinnut tuniniannginneranni pissappat.

§ 6. Mianersoqqussutit § 3 imm. 1 aamma § 4 imm. 1 naapertorlugit allassimasussat ima isikkoqassapput:

- 1) Ataanut qaqortuusumut naqinnerit Helvetica atorlugu qernertumik, silittumik naqinneqassapput.
- 2) Naqinnerit angissusaat imaassaaq tassunga allatassat allaffigisassap sapinngisamik annerpaartaa ulikkaassallugu.
- 3) Naqinnerit mikisut atorlugit, oqaaseqatigiinni naqinneq siulleq kisiat pinnagu oqaasilerinermillu tungaveqartumik piumasarineqartillugu.
- 4) Allatassap naqiterneqarfissaata nalaagut qeqqa aallartiffigalugu, poortap qaavata sinaa malillugu.
- 5) Qernertumik minnerpaamik 3 mm-isut annerpaamillu 4 mm-isut silitsigisumik kaajallallugu

sinaakkuserneqassaaq mianersoqqussummik paasisutissamilluunniit arlaannaatigulluunniit innarliinngitsumik. Sinaakkutaq qernertoq taanna sinaani pineqartumi qaavata minnerpaamik 32 aamma 45 procentianut aammalu qaavata 24 cm2-ianut § 5 imm. 1, 2 aamma 3-mi taaneqartunut ilaatinneqarsinnaavoq.

6) Kalaallisut aamma qallunaatut.

Imm. 2. Imm. 1 nr. 5-imi aalajangersagaq tupanut pujuliunngitsunut atuutinngilaq.

§ 7. Allatat mianersoqqussutit poortukkami akitsuutip allagartaanut naqinneqassanngillat.

Imm. 2. Allatat mianersoqqussutit ima naqiterneqassapput peerneqarsinnaajunnaarsillugit piiarneqarsinnaajunnaarsillugillu.

Imm. 3. Allatat mianersoqqussutit tarrisinneqarsinnaassanngillat, qallerneqarsinnaassanngillat imaluunniit allatanik assinilluunniit allanik akornuserneqarsinnaassanngillat aamma poortap ammarneratigut.

Imm. 4. Tupanit nioqqusiani allani cigarettiuunngitsuni allatat nipittartoq ilisarnaat atorlugu inissinneqarsinnaapput, ilisarnaatit nipittartut taakku peerneqarsinnaanngippata.

#### Pineqaatissiisarnerit

§ 8. Nalunaarummi matumani aalajangersakkanik unioqquitsinermi akiliisitaasussanngortitsilluni pineqaatissiisoqarsinnaavoq.

Imm. 2. Kalaallit Nunaanni pinerluttulerinermi inatsisini aalajangersakkat naapertorlugit inuk inatsisitigut pisinnaatitaasoq pisussaataaasorlu akiliisitaasussanngorlugu pineqaatissiisoqarsinnaavoq.

Imm. 3. Akiliisitsinerit imm. 1-2 naapertorlugit aalajangerneqartut Landskassemut nakkartinneqassapput.

#### Atuutilerfia

§ 9. Nalunaarut atuutilissaaq ilisimatitsissuteqarnerani.

§ 10. Nalunaarummi aalajangersakkat tupanik nioqqutinut ulloq 01. 05. 2016 sioqqullugu Kalaallit Nunaannut eqqunneqartunut atuutissanngillat. Augustip aallaqqaataata 2016 kingorna taamaallaat tupanik tuniniaasoqarsinnaavoq nalunaarummi aalajangersakkanik eqquutitsisunik.

§ 11. Nalunaarut atuutinngilaq sumiiffinni danskit-Amerikamiullu illersornissamut sakkutooqarfiini, isumaqatigiissut 27. april 1951-imeersoq naapertorlugu pilersinneqartuni kingusinnerusukkut allanngortinneqartoq Kalaallit Nunaata illersornissaa pillugu naapertorlugu pilersinneqartuni.

Martha Lund Olsen

/

Julie Præst Wilche

Ilanngussaq 1

Mianersoqqussutit katitigaasut tupat puuini Kalaallit Nunaanni tuniniarneqartartuni atorneqartussat